

江寧輿圖說



江甯輿圖序

皇帝御極之七年歲戊辰江蘇輿圖成曾文正公覽而善之乃命續繪江甯輿圖合成全省其測量勾摹諸法一如江蘇例局設於蘇垣以江蘇布政使督其役局用所需則江甯布政使籌款濟焉創始於同治八年己巳冬十有一月越五年癸酉冬十有二月事葳蓋甯屬封圻視蘇省且倍其爲地較險而其爲治亦較難若黃河之變遷運道之通塞以及兵防水利攸繫匪輕軍興以後民人蕩析離居廬井非昔經界多舛向時巖寨營壘之制頗著異同

今上聖神洞燭萬里特簡文正公督兩江時則瘡痍未平流離乍集慨然謀所以持其後者莫如正經界興水利以濟轉輸以固封守而在江海要衝之路運黃遷變之區尤宜周畫而盡善顧欲審緩急在知地勢欲知地勢在綜輿圖南疆古稱地利中亘長江倚爲天塹今則跨江北以爲防幅員旣擴考備宜周用是不惜艱難之費力成遠大之謀凡茲防河之要捍海之方其爲蘇省所從略者益復詳稽志乘博採羣言悉以

實測證之權衡變通折衷至當俾後之留心國是者得以有
備無患是則文正公之志也已巳冬文正公移節畿輔中更
馬端愍公任工猶未竟辛未之秋文正公秉鉞重來方且樂
觀厥成也乃甫定坤輿遠騎箕尾維時距正圖咨送裁數月

耳癸酉仲春

宗義奉

命承乏是邦爰飭兩藩司督率繪繕凡爲圖四十有三說四十有
三北極道里表一疆域表一府州幹路冊一城垣冊一舊黃
河高堰范塘隄工京驛運河鹽河潮河各冊三釐爲正本分
別奏咨以副本圖及圖說彙刊成帙與蘇省合冊以竟文正
公遺志因述其崖略如此其在局任事者曰何令紹章曰唐
令翰題最後曰吳丞恒董役者曰金徵士德鴻曰李茂才鳳
苞例得備書

兵部尙書兼都察院右都御史總督兩江等處地方提督軍
務糧餉操江南河管理兩淮鹽漕事務開縣李宗義序

江甯布政司屬府廳州縣輿圖凡例

一測繪諸法悉照蘇省原辦章程惟其閒地勢異同閒有未能一律者謹備識於後以備稽考

一分率舊照部頒步弓畫爲寸方縣圖方二里半府圖方五里全司總圖方十里蓋蘇屬州縣轄地縱橫極多六七十里界址稠密必得寬其分率方可纖悉備載甯省則壤地較大若仍照蘇省分率則阜甯東臺諸屬之縣圖佔幅尋丈不便展閱謹改縣圖爲五里方府圖爲十里方全司總圖爲二十里方惟與同治七年所呈蘇屬地圖未能合符茲亦按照節刪補呈一分以備合觀分別考證

一舊例橋梁作長方形牐壩作圓形但取醒目不計丈尺今查甯省各牐壩爲黃河水利關鍵尤爲緊要若仍以圓形標識不甚明析謹改作長方形長短寬窄各按分率庶蓄洩之宜有所參考

一黃河故道雖經淤墊似難再復然黃水變遷靡定欲溯其墊塞衝決之由必合新舊兩道互觀形勢謹詳測兩隄照

率繪出以考遺址

一蘇省刊本輿圖仿照胡文忠公地圖式分排門合今江省
照例接刊凡接聯界邊之處不能挖板分晰故蘇省圖可
單行江省圖必牽連蘇省邊境閱者須先將兩省目錄細
審卽知分合之法

江甯省總圖說

謹按江甯布政使所轄輿地南連皖吳北際梁宋統府四直
隸州二廳一州縣三十三東西廣七百五十里南北袤一千
二百里統計積地二十三萬六千餘方里截長補短約爲方
四百八十里謹遵

大清會典開載驛傳路程自省城至

京師二千四百四十五里

內府輿圖所列

京師正當赤道中綫北極出地三十九度五十五分省治偏東
二度十八分北極出地三十二度四分計南北距七度五十
一分東西距二度十八分準地球圓體緯度每度當二百里
經度以正餘弦折算距等各圈則省治在

京師經東三百八十九里有奇緯南一千五百七十里復準斜
弧邊角相求法推得穹面斜距逕直之數一千六百二十二
里奇論程站則誌人行論準望則從鳥道數有不同也考夫
全屬形勢東盡海疆南跨長江西襟洪澤北臨平陸所轄海

邊自海門境始西歷通州如臯西北歷東臺鹽城阜甯海州
贛榆抵山東日照境止計一千九十餘里其間支港口鬪龍
新洋射陽北洋北潮東陬新浦臨洪青口柘汪朱篷興莊汾
水計十三口舊時海船俱可深入近因海灘滋漲河漸湮淤
惟射陽北潮兩口尚爲深暢而北潮正當開山射陽則淺沙
暗衛所謂五條沙者輪艇俱不敢深入故論淮屬形勢以海
防爲重論全省形勢則以江防爲重也溯長江自海門境之
界洪東至句容境之炭渚溝計程四百餘里係甯省轄北岸
蘇省轄南岸而靖江一段南北俱入蘇省炭渚以西則兩岸
俱入甯省故崇海兩邑實入江之外戶圖山之間雖險要可
守必合鎮揚兩府籌之其江浦浦口與省城自爲犄角者實
已達閩內矣下運河自瓜洲西北歷江都甘泉高郵寶應山
陽至清河境止計程四百餘里中運河自清河西北歷桃源
宿遷邳州抵山東界止計程三百餘里不僅挽粟置郵實係
腹裏通榦水道中宮揚郡據以心腹清河扼其咽喉洪澤微
山助運蓄洩利害相依若夫舊黃河以北平陸曠野古稱戰

爭之地舊恃黃淮天塹今已無險可憑論北境兵防當以徐
州爲首重也

江甯府總圖說

江甯爲省城首府轄縣七江之南曰上元江甯句容溧水高
淳江之北曰江浦六合北界天長盱眙儀徵西界來安滁州
全椒和州當塗南界宣城建平東界溧陽金壇丹徒南北直
佔最長處二百六十里斜佔最長處二百八十餘里中截東
西平佔一百八十里北截東西平佔八十餘里南截東西平
佔七十餘里統計積地二萬三千八百方里以少廣法計之
方一百五十餘里也境轄長江南岸一百七十餘里北岸一
百五十餘里江浦浦口爲近處犄角揚郡鎮江爲遠處犄角
險要形勢全在臨江一面故前人畫江北兩邑分屬與南包
舉全江殆有深意溯東來要口以羅絲溝與儀徵南門港相
對羅盤綫值丑未江面八里爲第一重門戶棲霞山與划子
口相對江面六里此處南岸雖無港口而憑山瞭望聲勢可
聯足爲第二重門戶又西則觀音門至下關一帶崇山障其
內沙洲蔽其外草鞋夾天生設伏之所不能以門戶稱也其
下關口斜距浦口城江面十三里又爲近城內戶更折而西

上元縣圖說

上元縣江甯府附郭首邑境轄城東一面北寬南窄自汜河口至烏刹橋一綫下垂又有越轄之地故表廣斜直難以言狀自神策門北至觀音門江邊計逕直十四里自聚寶門南至丁公山溧水當塗兩界口逕直七十四里自朝陽門東至湯水鎮句容界口逕直四十里其三山聚寶兩門卽與江甯分界又自下關鎮江口東歷觀音門至三江口計迂曲江邊八十餘里與儀徵六合分界江心自三江口南歷龍潭湯水土橋至高陽橋計迂曲界邊一百五十餘里爲句容界自高陽橋西南至烏刹橋計迂曲界邊二十里亦爲江甯界自烏刹橋西南至丁公山計迂曲界邊二十餘里爲當塗界自橫溪橋東歷烏刹橋北循秦淮而上至下關鎮江口計迂曲界邊一百三十里爲江甯界統計積地三千三百四十一方里合一萬八千頃長江形勢舊以燕子磯爲險要近則沙洲漫漲此處已成夾江磯在平陸長江深流徙出八卦洲之外故江防須與儀六江浦分扼下關與浦口相對兩岸江灘俱有

漲沙蘆葦叢雜夾江分歧防江師船所宜注意者城東南東
北眾山拱環縣互江邊沿江東面並無通口惟下關一河南
接秦淮通句溧各境與江甯分轄自爲統境榦流亦出江要
害也其陸路以龍潭湯水爲西來要鎮溇化爲南來要鎮栖
霞巴斗各山臨江屏列與江北之靈巖山對峙足資瞭望石
臼湖在溧水境赤山湖在句容境兩湖之水彙入三汊口來
源也由三汊口歸秦淮河北流出江去委也境內山多水少
形勝甲於東南厥土實惟中下耳

江甯縣圖說

江甯縣爲省城附郭與上元同城境轄城之西南一面自聚寶門直南至碾砣橋當塗上元兩界口逕直六十三里東南至上方鎮上元界口逕直二十二里南少東至三縣塘上元句容兩界口逕直四十九里南少西至陶山當塗界口逕直五十八里西南至和尚港當塗界口逕直六十三里自和尚港口北東歷烈山大勝關至下關口計迂曲江邊七十餘里與江浦分界江心自下關沿秦淮河東南至上方門自上方門不沿秦淮由上元鎮至土山鎮自土山鎮迤南仍沿秦淮至烏剎橋自烏剎橋不沿秦淮西出碾砣橋共計迂曲界邊一百四十餘里爲上元界自碾砣橋西南至小丹陽自小丹陽西北至和尚港口計迂曲界邊六十餘里爲當塗界其東猴山嚴郎渡一帶復有轄地一百六十餘方里在上元溧水句容境內隔秦淮一河界不聯屬全境地形斜方而缺東面一角南北最長處九十四里東西最廣處七十里統計積地三千四百十四方里合一萬六千四百餘頃沿江一面與江

浦分阨下關口爲入境要津西北對浦口江面逕直十三里
羅盤綫值乾巽西南對江浦江面逕直二十一里奇羅盤綫
值寅申三口相距自成犄角之勢駐防最爲緊要其大勝板
橋江甯牧龍銅井諸鎮俱近接江邊江船至此均可收泊惟
不能逕達內地故其要次於下關境內水道惟以上元分轄
之秦淮爲幹流支河甚少自聚寶南下抵小丹陽衆山絡繹
闊約一二十里不等縣互境中故長江支港不能東達秦淮
分流不能西通必自下關繞道也其陸路支幹紛歧四達無
險可扼惟橫溪橋當塗之來路烏利橋當溧陽之來路較
爲阨要全境山居十分之二河道不足二百里亦無湖蕩農
田西資江水東挹山泉溝洫之利益遜於平陸水鄉也

句容縣圖說

句容縣距江甯七十里自北門北至羅絲溝出江逕直五十
四里東北至炭渚鎮丹徒縣界口逕直四十九里西北至張
橋上元界口逕直四十里自西門西至土橋鎮上元界口逕
直十六里西南至猴山三縣塘上元溧水兩界口逕直四十
四里自南門南至分界山溧水溧陽兩界口逕直七十二里
東南至茅山金壇界口逕直四十里自東門東至白兔鎮丹
徒界口逕直三十八里南北最長處一百三十二里東西最
廣處六十里統計積地四千八百七十六方里合二萬六千
三百餘頃自三江口東至炭渚溝計迂曲江邊三十里與儀
徵分界江心自炭渚溝南歷白兔至花山計迂曲界邊八十
里爲丹徒界自花山南歷茅山方山至了髻山口計迂曲界
邊五十餘里爲金壇界自了髻山口西南至分界山計迂曲
界邊三十餘里爲溧陽界自分界山北東歷巫山夾山至三
縣塘口計迂曲界邊九十里爲溧水界自三縣塘北歷土橋
湯水龍潭諸鎮至三江口計迂曲界邊一百八十餘里爲上

元界四境峰巒環繞惟中爲平原自白兔鎮西歷縣治至土
橋爲徒陽達省之要路北塘堰西來爲金壇入境之要路分
界山北來爲溧陽入境之要路殷家蕩東北來爲溧水入境
之要路而天王寺鎮距城南二十里爲總控南東西三面來
路之險要綠營汛守所宜注意北境江防以羅絲溝與泗源
溝相對爲扼要之處境內河渠爲四山所阻北境江水南不
灌城中境山水迴流境內惟西面自湖熟鎮迂道由秦淮河
出江者爲全境去委而治西南有赤山湖周邊二十九里山
水會歸其幹流俱由赤山湖分支一北經三岔鎮北東繞出
縣治又北抵亭子村而止一東北歷淤香鎮抵勝石橋而止
一南經天王寺又南抵心橋而止統計各河之長不足一百
二十里未能無旱潦之患也

溧水縣圖說

溧水縣北距江甯省城南門逕直八十里自北門北至夾山口句容界逕直二十七里北少西至三縣塘江甯句容兩界口逕直三十六里自西門西至烏剎橋上元界口逕直二十八里直西至丁公山當塗上元兩界口逕直二十六里自南門西南至龜山石臼湖邊當塗高淳兩界口逕直四十五里南至漆橋北街頭高淳界口逕直四十四里東南至桿西頭高淳溧陽兩界口逕直四十六里自東門東南至分界山句容溧陽兩界口逕直三十三里自三縣塘東南歷夾山口至分界山計迂曲界邊七十餘里爲句容界自分界山南至桿西頭計迂曲界邊三十里爲溧陽界自桿西頭西歷尋鎮至龜山西面石臼湖邊計迂曲界邊六十餘里爲高淳界自石臼湖邊北至丁公山朱莊計迂曲界邊四十餘里爲當塗界自朱莊東北至烏剎橋計迂曲界邊四十餘里爲上元界自烏剎橋東北至三縣塘計迂曲界邊十五里爲江甯界全境地形微近橢圓東西最廣處五十餘里南北最長處七十餘

里統計積地二千七百八十九方里內除石臼湖積三百八十六方里實計積地二千四百三方里合一萬二千九百餘頃境內羣山環繞爲甯蘇西南藩屏孔鎮爲南境要衝官塘爲東境要衝烏山爲北境要衝綠營汛守所當分駐秦淮河白鳥剎橋入境南達城又南而東歷紅藍蒲塘新橋諸鎮抵白馬橋岡身而止全境之幹流也石臼湖在境西南爲當塗宣城諸水停蓄之所明初高淳境內舊有運道名古胥溪是爲蘇甯要津故石臼諸水俱東入太湖嗣於永樂嘉靖閒堅築上下兩壩遏湖水北出秦淮而東南去委絕矣

江浦縣圖說

江浦縣屬江甯府隔江所轄爲省城西南屏藩自南門東南至江口逕直八里自東門東北至浦口鎮六合界口逕直二十一里自北門北東至哈大衛六合來安兩界口逕直三十里直北至西葛鎮來安滁州兩界口逕直二十七里西北至陳家淺滁州全椒兩界口逕直四十八里自西門西南至烏江鎮和州界口逕直五十里自烏江鎮港口北東歷老西港江浦港至浦口計迂曲江邊八十里與江甯分界江心自浦口鎮北西至哈大衛計迂曲界邊三十餘里爲六合界自哈大衛西至西葛鎮計迂曲界邊二十餘里爲來安界自西葛鎮西南至陳家淺計迂曲界邊四十餘里爲滁州界自陳家淺南至刁家營計迂曲界邊二十餘里爲全椒界自刁家營西南歷四馬山而東南歷石橋鎮至烏江鎮江口計迂曲界邊七十餘里爲和州界全境地形表斜而近長方錯出西面一角南北斜佔最長處七十餘里東西斜佔最廣處五十餘里統計積地二千五百六十方里合一萬三千八百餘頃其

長江一面自烏江東北至老西江一段江闊七八里更有烈
山烏石仙人兔兒各磯近傍東岸故中洪深水乃在西岸僅
闊四五里實爲上江來路省城要衝其烏江與銅井石磧與
河口老西江與大勝俱兩岸準對可與江甯對設礮臺互相
控制自老西江以北則縣治浦口兩城與省垣鼎立自成犄
角其閒江面亦窄沙洲滋長舊有夾江可分近亦蘆葦叢雜
瞭望聲援微有障隔故綠營汛守必藉長江師船爲之輔翼
也水道榦流在境北面西承皖省來源自陳家淺入境東出
六合自爲滁河分支絕少蓋緣中境衆山橫截南境石磧老
西江浦諸港江水抵山而止不能西通北境清流必由六合
繞道出江其陸路諸鎮以浦口爲東北之要西葛爲西北之
要新殿廟爲正西之要烏江爲西南之要俱宜分設汛防湯
泉鎮在城西北二十里以溫泉得名近泉數里煖氣蒸騰殆
地氣所鍾歟

六合縣圖說

六合縣在江甯府隔江正北四十餘里自北門北至馬家集
天長界口逕直四十里北少西至均樸橋盱眙界口逕直六
十九里自西門西北至施家集來安界口逕直六十二里西
至大營集來安界口逕直四十里自南門西南至浦口鎮江
浦界口逕直四十七里自東門南少東至划子口江邊逕直
三十六里東南至小河口儀徵界逕直四十三里西少北至
山頭鎮儀徵界口逕直三十二里自浦口鎮西歷通江划子
諸口至小河口計迂曲江邊八十餘里與上元分界江心自
小河口北歷東溝山頭各鎮至鍾家窪計迂曲界邊六十餘
里爲儀徵界自鍾家窪北至十字山口計迂曲界邊十餘里
爲甘泉界自十字山西歷野山馬家集至湯家營計迂曲界
邊九十餘里爲天長界自湯家營西至廣福寺計迂曲界邊
二十里爲盱眙界自廣福寺南歷施家雷官大營各集至哈
大衛計迂曲界邊一百里爲來安界自哈大衛東南至浦口
鎮計迂曲界邊三十餘里爲江浦界全境地形南平北袤南

北直佔六十三里斜佔一百十里東西平佔七十二里斜佔九十六里統計積地五千二百九十四方里合二萬八千五百餘頃沿江一面以划子口爲最要南距棲霞山西距草鞋夾江面僅闊四五里若與上元兩岸分設礮臺足可控制長江由此內達則歷瓜埠至縣治由縣治西達江浦又西入滁全各境一水可通故划子一河不特爲長江要口亦且全境榦流也小河爲划子分支亦出江之要靈巖山在城之南江之北其西面以雷官大營各集爲皖省來路中有榦河橫截必由舟渡未可長驅汭河鎮傍河聚市設立渡船實西北之要鎮其竹鎮集馬家集當天盱來路南達城東達揚郡平陸可通是尤北境之要也沿江自十字岡至通江集一帶岸多衝缺八卦洲漸漲江北舊地則漸坍矣

高澆縣圖說

高澆縣北距江甯南門逕直一百三十里西距西陡門石臼湖邊逕直二十三里西南距水揚鎮宣城界口逕直二十里東南距青龍橋建平界口逕直三十里東距河口鎮溧陽界口逕直五十二里東北距桿西頭溧水溧陽兩界口逕直四十八里北距石臼湖邊逕直十八里自桿西頭西歷尋鎮抵龜山石臼湖邊計迂曲界邊六十餘里爲溧水界自龜山西南歷蕭港一字溝抵梁陡門港口計迂曲湖邊四十里與當塗宣城分界湖心自梁港口東歷梁陡水揚諸鎮至青龍橋西三里許計迂曲界邊六十餘里爲宣城界自宣城界口東北歷鄧埠至昇平蕩汊河口計迂曲界邊三十餘里爲建平界自昇平蕩汊河口北至桿西頭計迂曲界邊三十餘里爲溧陽界全境橫長縱短東西最廣處逕直一百里南北最長處逕直四十里統計積地一千九百八十五方里內除固城湖二百四十方里實計積地一千七百四十五方里合九千四百餘頃東境山脈蜿蜒西境湖蕩浩淼爲甯屬幅員最

小之區水陸交錯圩田四布無險可扼惟上下兩壩旣爲水陸衝衢亦當建廣北來孔道較爲扼要古胥溪自溧陽之河口鎮入境西南歷鄧埠又西越固城石臼兩湖北出秦淮卽明初漕運故道自築上下兩壩水道不通故近時商賈往來必在鄧埠鎮舍舟從陸也向來西水甚旺漲溢之時壩內外高低八尺許壩基每慮冲決今測上水實高四尺固城湖灘深處亦不過三尺蓋夷險之勢今昔攸殊矣縣境舊隸溧水明時始析今治建縣於溇溪鎮北枕岡陵南連湖蕩舊無城郭垣墻故官守較難近來水勢漸衰固湖稍稍涸出苞桑之計當有議及者

淮安府總圖說

淮安府轄縣六附郭曰山陽北曰清河安東西曰桃源東曰阜甯鹽城北界海州沭陽西界徐州府之宿遷安徽省之泗州盱眙南界揚州府之寶應興化東臺東界大洋西境南北最長處一百七十餘里東境南北最長處二百七十餘里東西最廣處三百八十餘里統計積地五萬七千六百七十一方里以少廣法計之方二百四十里爲甯屬府境幅員最大之區濱海灘多葦蕩鹽場交錯其間故阜鹽兩境佔地十之六安清山桃四邑佔地十之四一府之內疆域大小懸殊也東境統轄海邊二百九十餘里以北潮射陽爲兩大口中境統轄舊黃河四百餘里內白清河以東爲淮河之舊址清河以西爲宋元以來運河舊址自明代黃水南行奪運奪淮東出安阜海口潘季馴因勢築隄東以歸槽 國朝靳文襄踵其遺制固高堰隄防堵三河插壩闢清口引河引淮東北黃淮合一蓄清拒黃清黃順軌者二百餘年然黃水挾沙而行到處停積究因淮流力弱沖刷無多黃水日進日墊逼淮南

下並將出海之道自爲墊塞久成北徙之勢咸豐間銅瓦廂
決口河流入濟近年新道已成不獨故河廢棄卽全淮亦未
能驟順舊軌也河之北爲文襄新闢漕渠名中運河境內所
轄自徐屬洋河鎮始東至楊莊計迂曲一百十餘里近傍黃
隄河身高仰自楊莊東至清河地勢驟低名下運河舊設五
壩三閘以遏建瓴之勢近查天妃正閘河身已淤閘座亦損
漕運上下專行越閘每慮擁擠亟宜修整前規此境內黃運
之大略也若夫水防兵防則以桃源之下家湖山陽之三河
口爲西境要害阜甯之射陽北潮兩海口爲東境要害府城
駐漕運總督設漕標四營南河奉裁以漕運總督兼轄河道
改河兵爲標兵分設淮揚鎮總兵統轄參將以下分守各要
隘以資防禦

山陽縣圖說

山陽縣爲淮安府附郭首邑自北門北至老壩鎮安東界口
逕直二十三里東北至蘇家嘴阜甯界口逕直五十五里自
東門東至青溝鎮鹽城阜甯兩界口逕直五十八里東南至
太倉鎮鹽城寶應兩界口逕直五十六里自南門南至黃浦
鎮寶應界口逕直三十九里自西門西至武家墩清河界口
逕直二十八里西南至老子山清河盱眙兩界口逕直一百
十四里又自老子山東至二壩口計洪澤水面二十里爲盱
眙界自二壩口東歷黃浦鎮至太倉鎮計迂曲界邊五十餘
里爲寶應界自太倉鎮北至青溝鎮計迂曲界邊三十里爲
鹽城界自青溝鎮北歷蘇家嘴至舊黃河中洪計迂曲界邊
四十餘里爲阜甯界自阜甯界東南循舊黃河至高家圩計
迂曲界邊八十餘里爲安東界自高家圩西循舊黃河至老
壩鎮又西越運河至高升橋自高升橋西南循高堰隄工至
周橋自周橋出洪澤湖至老子山共計迂曲界邊一百六十
餘里爲清河界統覈全境南北最長處九十餘里東西最廣

處一百里共計積地七千五百九十二方里合四萬一千頃
境內分轄運河七十餘里祇有興文涇河兩閘可以啟閉餘
則多鑿涵洞以灌農田舊時北有黃河南岸隄工西有洪湖
高堰隄工每當伏秋巨汎水駕屋梁風浪撼隄民難安枕近
來黃河改道北行洪澤南下三河自武家墩至老隄頭一帶
湖涸爲陸水不抵隄黃河故槽更屬積淤高墊兩險俱平水
患盡息考近時形勢惟在修護運隄閘壩俾蓄洩以時農田
漕運兩有所資則盡善矣境當黃淮南北衝衢江浙入都要
道故漕運總督駐紮城中統轄漕標四營足資重鎮板閘設
立關部統以淮關監督專理稅務

阜甯縣圖說

阜甯縣屬淮安府爲府治濱海東北邊境自北門北至北潮河蛇頭港口海州界逕直一百二十七里西北至雲梯關安東界口逕直四十四里自西門西至周門集舊黃河渡安東界口逕直四十五里西南至蘇家嘴山陽界口逕直五十五里自南門南少西至清水溝口鹽城界逕直六十里南少東至永濟橋鹽城界口逕直四十二里自東門東至射陽河海口逕直一百三十三里東北至舊黃河海口逕直一百三十七里又自北潮河口東南歷舊黃河北洋射陽各口至新洋港北五里許計迂曲海邊二百六十里界際外洋自海邊東歷永濟橋至青溝鎮計迂曲界邊二百二十里爲鹽城界自青溝鎮北歷蘇家嘴至舊黃河中洪計迂曲界邊四十餘里爲山陽界自山陽界東北循舊黃河至雲梯關北至蛇頭港計迂曲界邊一百六十里爲安東界自蛇頭港循北潮河北至海口計迂曲界邊五十里爲海州界全境地形南寬北銳南北最長處二百里東西最廣處一百九十里統計積地二

萬一千四百三十方里合十一萬五千七百餘頃爲甯屬幅
員最大之區舊卽廟灣場鹽地自雍正九年始析今治若以
范公隄接穿裏河分畫東西竈民兩境則民地僅佔二萬一
千六百頃鹽地實佔九萬餘頃蓋地居青紅五條各沙之間
海灘日長鹹潮漸遠又當射陽河清流東灌故漲地愈多產
鹽愈少半成葦蕩蘆田若能通溝築圩盡力開墾亦膏腴也
沿海一面因有外沙包護淺處極多故射陽北潮雖係通海
巨港而輪船海舶未能駛達於此設立礮船探明沙路上下
巡哨實有備無患之計范公隄斜互南境南接鹽城北抵射
陽河口本爲捍禦風潮而設今距海旣遠反致梗塞清流故
其閒礎閘引河尤宜時加疏濬也

鹽城縣圖說

鹽城縣屬淮安府傍范公隄爲城西距府治逕直一百六十餘里自北門西北至永濟橋阜甯界口逕直五十一里自西門西至青溝口阜甯山陽兩界口逕直九十四里西南至大縱湖中沙溝鎮興化界口逕直七十四里自南門東南至大團鎮興化界口逕直四十一里自東門東至鬪龍港海口逕直七十九里又自鬪龍港北歷新洋港至阜甯界計迂曲海邊三十餘里界際大洋自新陽港北迤西歷永濟橋至青溝鎮計迂曲界邊二百二十餘里爲阜甯界自青溝鎮南至太倉鎮計迂曲界邊三十餘里爲山陽界自太倉鎮東南越大縱湖至湖邊界角計水程界綫六十餘里爲寶應界自界角東歷沙溝大團至磨擔港口計湖中水程三十餘里迂曲界邊一百二十里爲興化界自磨擔港東北沿鬪龍港至海口計迂曲河邊一百里爲東臺界統覈全境南北最長處一百六里東西最廣處一百九十餘里共計積地一萬二千三百二十七方里合六萬六千五百餘頃內除范隄以東之鹽地

四千九百二十方里合二萬六千五百餘頃大縱湖積地一
千四百方里合七千五百餘頃實計所轄田地六千方里合
三萬二千四百頃出海之港二曰鬪龍曰新洋河勢曲折不
甚深闊海船鮮能內達故雖際海疆竝非險要而與高境內
承運河傾瀉東流出海者專恃此兩口必須節節深通方於
裏下河農田實有裨益蓋境內范公隄斜互百里攔截東西
其間礎閘雖多有引河出海者僅惟新洋鬪龍兩處甚慮宣
洩不速而隄西地窪河蕩紛歧隄東地仰淤灘遼廓疏濬之
利亦宜重在東境伍佑新興兩場傍隄爲市駐大使以轄竈
民然海灘漸漲鹹潮漸徙覈其產額蓋遠遜於通州各場矣

清河縣圖說

清河縣隸淮安府爲甯省第一衝繁要缺自北門北至安吉寨安東沭陽兩界口逕直五十八里北少西至錢家集沭陽界口逕直六十三里西北至八集鎮桃源沭陽兩界口逕直五十七里自西門西至界河口桃源界逕直三十七里西南至洪澤湖中老子山山陽盱眙兩界口逕直一百十二里自南門南少西至順河集山陽界口逕直五十四里東南至運河山陽界口逕直十里自東門東北至朱家集安東界口逕直二十里又自舊黃河中高家圩西循黃河至老壩鎮自老壩鎮西越運河歷高升橋至武家墩自武家墩西南循高堰隄工至周橋鎮自周橋鎮出洪澤湖至老子山共計迂曲界邊一百六十餘里爲山陽界自老子山北至黃家馬頭計洪澤湖水面六十餘里爲盱眙界自王家馬頭北歷八集鎮至錢家集計迂曲界邊一百三十里爲桃源界自錢家集東至安吉寨計迂曲界邊十餘里爲沭陽界自安吉寨東南至高家圩計迂曲界邊七十餘里爲安東界全境橫窄縱長西南

畫隸洪湖一角南北最長處一百四十里東西最廣處五十餘里統計積地三千四百十五方里合一萬八千四百餘頃外轄洪湖水面約計九千餘頃運河環繞城北西歷頭二天妃等三閘至馬頭自馬頭東歷五壩至楊莊爲中下兩運河交匯之所其間相距逕直不過十餘里而地平高低約八九尺故河形必迂曲盤旋多設閘壩以緩其勢當中運河盛漲之時天妃閘下水流如箭漕船上下每費牽挽此非人力未盡蓋地勢使然也馬頭鎮西南舊有引河挽洪澤北行蓄清敵黃近時黃河北徙洪澤南歸此處引河淤成平陸而草壩以東黃河故槽亦已斷流情形今昔懸殊矣其陸路以王家營爲入都要站一由錢家集入沭陽境爲東路一由漁溝集入桃源境爲西路故運河旣當南北水道之咽喉而王營尤爲五省陸路之總匯老子山兀峙洪湖當淮水門戶皖豫東來之要專設洪湖營都司重汛防也

安東縣圖說

安東縣隸淮安府在府治北五十六里自北門北至六塘河
海州界口逕直六十二里東北至蛇頭港海州界口逕直一
百四十里自東門東北至雲梯關阜甯界口逕直七十五里
東至周門鎮阜甯界口逕直四十四里自南門南至舊黃河
山陽界口逕直二里自西門西南至高家圩山陽清河兩界
口逕直二十七里西北至安吉寨沭陽清河兩界口逕直四
十七里又自安吉寨北東至王家圩計迂曲界邊八十餘里
爲沭陽界自王家圩東北越六塘河鹽河至北潮河灘計迂
曲界邊一百五十餘里爲海州界自北潮河灘南至雲梯關
又西南至蘇家嘴北循黃河中洪計迂曲界邊一百六十里
爲阜甯界自阜甯界西循舊黃河至高家圩計迂曲界邊八
十餘里爲山陽界自高家圩北至安吉寨計迂曲界邊七十
餘里爲清河界全境地形表斜而東北錯一銳角南北斜長
處一百八十里直長處僅六十餘里東西平廣處一百十里
統計積地七千方里合三萬七千八百頃北境與海州交界

處有莞瀆場鹽地與阜甯交界處有葦蕩營兵地棋布星羅
犬牙相錯境轄舊黃河北岸一百五十餘里向分上下河兩
汛俱有歲修要工嗣因黃河北徙各工均已裁撤而河地亦
有開種成田者運鹽河自高家圩東北流至海州境計迂曲
一百十餘里河底高墊每慮淺塞全賴運河異漲六塘放水
方通漕運故蔡工以南時有挑濬之工其南境民便一帆等
河承響水口南下分流亦屬盈涸不常蓋近黃之地靡不積
沙高墊溝洫難通地瘠民窮素稱淮屬薄壤而百祿大興薛
集一帶爲境內膏腴兼有宜桑之地土人不諳種植誠有以
倡導之亦富民之一術也

桃源縣圖說

桃源縣屬淮安府距府治九十里自北門北至韓集宿遷界口逕直六十九里北少東至唐家圩沭陽界口逕直五十七里東北至錢家集清河沭陽兩界口逕直六十一里自東門東至七孔橋清河界口逕直三十五里東南至運河清河界口逕直三十二里自南門南至曹家嘴洪澤湖邊逕直五十二里自西門西南至界頭集泗州界口逕直四十六里西至金鎖鎮泗州界口逕直六十里又自陸家嘴循洪澤北灘歷高家渡曹家嘴至王家馬頭計迂曲湖邊一百七十餘里與清河泗州盱眙分界湖心自王家馬頭北歷八集鎮至錢家集計迂曲界邊一百三十里爲清河界自錢家集西北至吳圩村計迂曲界邊六十餘里爲沭陽界自吳圩村西南歷韓集丁家嘴洋河鎮至金鎖鎮計迂曲界邊一百三十里爲宿遷界自金鎖鎮東南歷界頭集至曹家嘴計迂曲界邊七十餘里爲泗州界全境形勢南北最長處一百二十餘里東西最廣處一百里統計積地五千九百十二方里合三萬一千

九百餘頃外轄洪澤湖一角邑治東傍河岸西濱湖灘當伏
秋巨汎黃淮並漲之時至爲危險嗣經黃河改道洪澤亦有
漲灘水患漸息民無蕩析矣惟是中境黃河所經之處積沙
四墊兼梗長隄挹注無源難通溝洫霖雨則窪地皆湖久晴
則溝河盡坼不僅稻田絕少卽豆麥雜糧亦鮮豐收之歲厥
土爲淮屬最下也境轄運河一百里以衆興集爲要站與縣
治隔河相望實汎防重地六塘河自仰化集入境委曲東行
百里至錢家集遞入沭陽平時水勢極淺民可徒涉當運河
異漲開放劉老澗始有巨流東注也

海州直隸州總圖說

海州直隸州轄縣二北曰贛榆南曰沐陽西北界山東省之日照莒州蘭山郯城西界徐州府之宿遷南界淮安府之桃源清河安東阜甯東北界大洋東西最廣處二百四十餘里南北最長處二百三十餘里統計積地三萬九百餘方里以少廣法計之方百七十里也東北一面自汾水河至北潮河計轄海邊三百三十餘里以新浦北潮爲入內要口朱篷青口爲商船聚市之所沙灘遼闊大洋深洪距灘數十里故輪艇巨艦未能駛近各口固非海防重地惟鹽菹饒裕多梟販出入師船之備未可稍弛北潮河灘盡係蕩地舊分葦蕩營十隊撥駐河兵略照屯田章程額輸柴料以備黃河歲修之需近因黃水北徙河工裁併柴料改折地多拋荒兵多困乏雲臺山繇亘新浦之東卽古之田橫島形勢嶮巖山嶼曠衍向分兩支北支孤懸海外南支接連舊地中隔羊山大洪近時山脈滋長兩支合一羊山洪僅存一綫通流陸行不隔其西墅高公島兩處俱在北面際邊足可瞭望大洋宜設礮臺

斥埃鳳凰城一名南城在雲臺南麓向駐東海營都司亦以
控海島之險也全境水道以沭河爲大幹由郟宿入境經沭
陽及州治北由新浦出海夏盈冬涸消長不常六塘河爲西
南來源由龍溝武漳等河會北潮河出海鹹運重餼專賴其
南北貫濟莒州大沙等河爲北境來源贛邑農田之所資東
門龍王諸河爲東境經流貫注於竈民交錯之地板浦鎮據
三場總彙北嵯要地也響水口扼北潮咽喉葦營要地也其
西境際邊山岡起伏陸路紛歧以桃李高唐兩鎮爲最衝歡
墩一鎮爲次衝綠營汛防所宜注意

海州圖說

海州爲甯省濱海東北邊境自北門北至東關鎮贛榆界口
逕直二十二里西北至臨洪鎮贛榆界口逕直三十里自西
門西少北至羽山郟城界口逕直七十里直西至桃李山郟
城界口逕直一百十三里西南至洪家圩青伊碩項湖邊沐
陽界逕直六十五里自南門南至王家圩沐陽安東兩界口
逕直一百里南少東至新安鎮南渡口安東界逕直一百八
里自東門東北至指頭港安東界口逕直一百十四里直西
至北潮河海口阜甯界逕直一百三十二里自北潮河海口
南至葦營九隊計迂曲界邊五十餘里爲阜甯界自葦營九
隊西南越鹽河至王家圩計迂曲界邊一百五十餘里爲安
東界自王家圩西北歷湯溝洪圩至三界口計迂曲界邊一
百六十餘里爲沐陽界自三界口東北至末山計迂曲界邊
一百里爲郟城界自末山東至沙頭海灘計迂曲界邊九十
里爲贛榆界自新浦口東歷雲臺山至北潮河口計迂曲海
邊二百二十餘里界際外洋東西最廣處二百五十里南北

最長處一百三十餘里統計積地一萬七千八百十五方里
合九萬六千二百餘頃淮北鹽場葦營兵地犬牙交錯碁布
星羅境內水道以運鹽河爲南北幹流北潮河爲出海要口
大沙河承西北來源六塘河承西南來源青伊碩項等湖爲
六塘之分蓄武漳龍溝義澤岑志東門六里白蜆等河俱東
洩鹽河之水向有壩基每當伏秋場鹽掣運時築壩蓄水惟
是鹽河中截窪下南北兩截高仰六塘河水正灌中截就下
東趨其勢順分達南北其勢逆是以放壩則挽運維艱築壩
則西境旣虞泛濫東境又無灌溉商民因壩爭執無歲無之
故境內蓄洩之宜當兼籌竝顧勿容稍有偏畸也鹽地計分
三場曰中正板浦臨興潮近溷濃用曬不用煎與淮南異海
分司舊駐板浦鎮今移駐清河境內之西壩便商情也響水
雙港兩鎮扼北潮進口舊駐州判及葦營千總雲臺山擅海
濱形勝舊駐南城都司分資防守

贛榆縣圖說

贛榆縣隸海州直隸州在州治北境沿海際邊自東門東南至青口海口逕直二十里東北至汾水口海口日照縣界逕直六十四里自西門西北至黑林莒州蘭山兩界口逕直五十里西少南至歡墩埠蘭山郟城兩界口逕直四十八里自南門西南至清河鎮海州界口逕直六十七里南至東關鎮海州界口逕直三十九里又自沙頭海灘北歷青口朱篷興莊柘汪諸口至汾水計迂曲海邊一百十里界際外洋自汾水口北沿汾河至界嶺計迂曲河邊二十里爲日照界自界嶺西歷盧纜九泉大吳等山至黑嶺鎮界角計迂曲界邊八十餘里爲莒州界自界角南至歡墩埠西六里許計迂曲界邊五十餘里爲蘭山界自蘭山界南至末山計迂曲界邊十餘里爲郟城界自末山而南而東歷清河臨洪東關等鎮至沙頭海灘計迂曲界邊八十餘里爲海州界全境地形略近斜方南北直長處八十里斜長處一百三十里東西最廣處六十餘里統計積地四千九百六十方里合二萬六千七百

餘頃東境有臨興場鹽地交錯於民地之間濱海一面以青
口朱篷兩處爲要口港不深闊輪艇巨艦未能進泊惟商舶
集市而已西北一面與山東分界者岡嶺起伏直接海州以
下其閒惟黑林歡墩兩處爲平坦要道汛防扼守之所全境
幹流六俱西接山泉東達海口一支由界嶺出汾水一支由
陡溝嶺出柘汪一支由九泉山出朱篷北境之源委也有從
大吳山出興莊者黑林出青口者中境之源委也其大沙河
一支由歡墩埠入境歷臨洪遞接海州則爲南境源委地雖
濱海斥鹵而灌溉之利較勝於海沭矣

沭陽縣圖說

沭陽縣隸海州直隸州在州治西南一百三里自東門東北至洪家圩海州界逕直三十九里西少南至王家圩安東海州兩界口逕直六十九里自南門南少東至錢家集清河桃源兩界口逕直五十一里南至唐家圩桃源界口逕直三十六里自西門西至沭河黃家圩宿遷界口逕直六十八里西北至郟城宿遷三界口逕直九十里又自三界口東南越青伊碩項兩湖至王家圩計迂曲界邊一百六十餘里爲海州界自王家圩西南至安吉寨計迂曲界邊八十餘里爲安東界自安吉寨西至錢家集計迂曲界邊十餘里爲清河界自錢家集至吳家圩北五里許計迂曲界邊六十餘里爲桃源界自桃源界北至龍見莊東北循沭河至塔山自塔山北循桃花澗至三界口計迂曲界邊一百四十餘里爲宿遷界統覈全境南北直佔最長處七十餘里東西斜佔最長處一百五十餘里共計積地八千一百六十三方里合四萬四千頃以沭河爲全境幹流西北承郟城蘭山諸水爲來源東歷郟

店燕集經縣治又東歷張集鐘灣湯溝入北六塘貫海州境之鹽河爲去委其間分流曰存子河曰上山河俱北流入青伊湖又北出海州境之新浦口河槽闊而不深隨山水消長時涸時盈故兩岸俱築高隄防其泛濫四境高窪不均支港絕少兼被高隄攔阻雨暘稍愆卽有旱潦之患在沐河西北高流一帶地勢隆高頗宜豆麥其西境本係碩項青伊湖地近漸淤墊歷經開墾究係瘠薄低區境居淮海之交雖非首要亦爲次衝錢家集扼淮屬北來之通衢新壩鎮扼海州南來之通衢高唐桃李兩鎮近接入都孔道當徐屬山東來路實清淮之後戶也

揚州府總圖說

揚州府距省城西南一百三十里轄二州六縣附郭曰江都
甘泉東曰泰州東臺興化北曰高郵寶應西曰儀徵南界大
江與江甯府之上元句容鎮江府之丹徒分界江心西南界
通州之泰興如臯東界大洋東北界淮安府之鹽城西北界
淮安府之山陽西界安徽省之盱眙天長江甯府之六合南
北直佔最長處二百十餘里東西平佔最廣處三百十里統
計積地五萬一千六百餘方里以少廣法計之方二百二十
餘里也南濱江北臨淮爲省城隔江之屏蔽南北往來之衝
要形勢首重長江次重運河三江營焦山瓜洲等處皆天險
足資鎮守而瓜洲口尤爲運河出江之要津舊駐副將今隸
長江水師聯絡鎮江之勢不分畛域江防甚周密也運河自
瓜洲北歷江都甘泉高郵寶應至黃浦鎮淮安府界口計程
二百四十里爲全境脈絡河西湖蕩淼漫直抵平山以北河
東支港紛歧總名裏下河地盡低窪東有范隄攔阻出水要
口遠在淮安境內之射陽而運河河身北高南下水流迅急

高寶諸湖上承洪澤巨浸由三河口滔滔直下裹下河田地
在運河水面數尺之下每當伏秋大汛居民險如釜魚蓋數
邑安危盡繫東西兩隄其間插壩鱗次爲蓄爲洩前人之制
度經營至周且備而千鈞一髮呼吸交通得其宜則利失其
宜則害又在後人因時變通也其東境濱海一面沙灘遼闊
一望無際范公隄外鹽竈羅列外蔽暗沙深水針洪遠在沙
東並無要隘無須駐守西境與盱眙天長接壤者有湖蕩阻
隔亦非汛防所重惟儀徵一邑當西南陸路之衝來滁東來
之要六合諸山在儀徵之西實爲全郡屏藩兩淮鹽運使駐
郡城綜理漕綱揚由兩關稅務以常鎮道督理之統覈江甯
布政使屬財賦之區以揚郡爲巨擘蓋陂澤之利鹽莢之饒
商賈之所聚實臨江一大都會云

江都縣圖說

江都縣爲揚州府附郭首邑自雍正十年析西北境爲甘泉縣故江都所轄之境俱在東南一面地形南隨江勢凹凸北與甘泉界斜亘自南門南至瓜洲口逕直二十七里西南至蝦蟇橋儀徵甘泉兩界口逕直二十三里自北門西北至花家莊甘泉泰州兩界口逕直五十七里自東門東至唐莊泰州泰興兩界口逕直六十九里東南至揚子港口出江逕直六十四里東西最廣處九十六里南北最長處五十四里最短處二十里統計積地三千一百四方里合一萬六千七百餘頃自瓜洲口西北抵新集子蝦蟇橋計迂曲界邊三十餘里爲儀徵界自蝦蟇橋北歷郡城仙女廟至花家莊計迂曲界邊一百里有奇爲甘泉界自花家莊少東而南至唐莊迂曲界邊八十餘里爲泰州界自唐莊南至揚子港口迂曲界邊三十里爲泰興界自揚子港西至瓜洲口迂曲江邊百餘里向與鎮江府分轄江心近則沙洲滋長稍變遷矣沿江所轄計有三大口曰瓜洲北入運河曰沙頭西達運河東達二

道橋曰三江營西北達仙女廟爲渡江所必經實北達之衝
衢長江形勢瓜洲口與京口相對江面斜距十五里奇羅盤
綫值乾巽沙頭港與丹徒口相對江面斜距二十里奇羅盤
綫值壬癸其三江營口則與圖山南北相對東有太平洲西
有新舊漲沙分成夾江數道江艇西達金陵至此必迂迴盤
折不能逕駛此乃自然之險要不特分限南北已也內地河
道以運河裏下河爲正榦運河自彎頭鎮入境南至瓜洲口
計六十里爲漕運孔道裏下河東歷仙女儀陵至彭家橋泰
州界計七十里爲鹽運孔道本由彎頭會合茲設壩改從六
閘出入蓋緣運河來源甚遠南流甚急彎頭鎮爲分匯之所
每當伏秋盛漲壁虎橋口流行如矢分道南趨故董溝石洋
二道橋諸流會三江營出江者固爲洩水之大綱而六閘分
流亦順導之良軌其中閘至白塔河爲三江營支口渡江舟
楫可以繞道北達亦江防之要也

甘泉縣圖說

甘泉縣爲揚郡附郭舊隸江都雍正十年始析北境分設今治自北門北至接駕橋高郵界口逕直五十五里東北至樊川鎮高郵泰州兩界口逕直六十六里自西門西至新集鎮儀徵江都兩界口逕直十三里西北至熊家壩天長界口逕直四十八里南門外俱屬江都自新集子而北而西歷張家集月塘集至十字山計迂曲界邊八十餘里爲儀徵界自十字山東北歷熊家壩至三界口計迂曲界邊五十餘里爲天長界自三界口東歷接駕橋露筋鎮邱墅鎮永安鎮至樊川鎮計迂曲界邊九十里爲高郵界自樊川鎮南至花家莊計迂曲界邊十餘里爲泰州界花家莊東南歷仙女鎮抵新城循夾城出南門東至新集子計迂曲界邊一百里奇爲江都界全境地形北平南斜西南境錯出一角南北最長處六十餘里東西最廣處一百十里統計積地三千七百七十五方里合二萬三百餘頃運河爲穿境榦流亦挽漕要津白露筋鎮南至彎頭計長五十餘里西承邵伯湖東接綠洋喬墅諸

儀徵縣圖說

儀徵縣隸揚州府屬東北距府治逕直四十七里西南距省
治逕直八十餘里自北門北至甘泉界牌逕直三十二里東
北至張家集甘泉界口逕直二十九里自東門東少北至新
集子甘泉江都兩界口逕直二十里東少南至瓜洲口出江
逕直三十一里自南門南至泗源溝出江逕直六里自西門
西至東溝鎮六合界口逕直三十里西北至青山甘泉六合
天長三界口逕直四十里東西最廣處逕直六十二里南北
最長處逕直四十里統計積地一千九百六十五方里合一
萬六百餘頃自瓜洲口西至東溝口計迂曲江邊七十餘里
與丹徒句容上元分界江心自東溝北至界墩三界口計迂
曲界邊四十餘里爲六合界自界墩東南至新集子計迂曲
界邊七十里爲甘泉界自新集子東南至瓜洲口計迂曲界
邊三十餘里爲江都界長江東來恃江都爲門戶自瓜洲口
迤西有里世四一徵潤各洲滋長江心江面收窄深洪僅闊
四里爲境內可扼之險又西則泗源溝與句容之羅絲溝相

對羅盤綫值艮坤江面斜距八里亦屬守望可及泗源新河
近可達城是爲濱江之要口境地北高南下南北輸流惟新
河龍河寥寥數道俱北抵高原而止不通鄰境西門一河西
通運河以達府治城東南向係倚江近因北新雞心萬壽里
世永定等沙洲滋長毘連舊時夾江亦成內地河渠矣西北
境山勢蜿蜒悉從天長發脈銅山高七十丈距城西北二十
里捺山高六十丈距城北三十餘里甘草山在城西十餘里
雖係境內著名之山實土阜而已其月塘集山頭鍾家集乃
西北入境要道綠營汛防所宜分駐以資捍禦